



Minggu, 19 September 2021
Ogen :Kejadin 50:15-21



Dame I Bas Pusuh Nari



Ibas sada wari, ercakup-cakap me senina-senina Jusup kerna kecibalna i Mesir kenca bapana Jakub enggo mate. Lit kebiaren senina-seninana e, nginget-ninget perbahanenna si jahat ndube man Jusup. Aru atena, adi Jusup e pagi erbalas man bana kerina. Jusup e mehuli erkiteken i je denga bapana. Genduari bapana enggo mate, entah lit denga nge ukurna erbalas, bage me i bas pusuh seninana. I bas ia ercakup e, ibahanna sada kesepakatan, 'mpeseh tenah bapa.' Labo lit bage kata bapana tupung ia ngeluh denga, saja gelah teraloken Jusup, ikatakenna e tenah bapa. Isi tenah e, 'alemilah salah senina-seninandu asum ibahanna nai si la mehuli man bandu.'

Tangis Jusup megi tenah enda, lenga kepe tek seninangku e man bangku bage bas pusuhna. Situhuna ndekah me Jusup e erbahan perdamen ras seninana, tupung ielaina man bas ruangenna, ope man idakepna, iemaina sada persada seninana e. Enggo iuduhkenna perdamen e si reh bas pusuhna nari. E maka isuruhna ia kerina tading i Mesir, iberekenna daerah Gosen inganna tading ras rusaha, iberekenna keperlunna ope lenga lit penghasilen seninana e. Perbahanen si mehuli e labo terjeng mpesenangken ukur bapana si paksa e nggeluh denga. Situhuna bahanna bage erkiteken Tuhan kin si lit i bas pusuhna. Sura-sura Tuhan kin leben namaken ia ku Mesir gelah lit dalamNa engkelengi ras nelamatkan bangsaNa i bas paksa kelihen nari.

Adi Tuhan kin ringan i bas pusuh, mahan bana i bas pusuhta nari nggit erdame ras maba perdamen. Erdame e la terjeng biber entah terjeng kata-kata ngenca. Perdamen e teridah arah perbahanen si mehuli. Malem ateta adi bas pusuhta nari nggit erdame. Nina Herbert Hooper, perdamaian tidak di lakukan di meja dewan atau oleh perjanjian, tetapi di hati manusia.